

INUIT ATAQATIGIIT

INATSISARTUNI



Nuuk, 30.08. 2013

Inatsisartut suleriaasianni § 37 naapertorlugu Naalakkersuisunut apeqquutit imaattut saqqummiupakka:

(Inatsisartuni ilaasortaq Sara Olsvig, Inuit Ataqatigiit)

Apeqquutit:

1)

Kalaallit Nunaata Issittumi Siunnersiusoqatigiinni peqataanera pillugu allakkatigut Naalagaaffeqatigiiffiup Canadallu akornanni isumaqatigiissuteqartoqarpa? Allakkatigullu isumaqatigiissusiortoqarsimappat Naalakkersuisut isumaqatigiissut saqqummiutissallugu pilersaarpat Inatsisartullu Nunanut allanut Sillimaniarnermullu Ataatsimiititaliaanut assinganik nassiuussiniarpat?

2)

Isumaqatigiissutaava Canadamiut siulittaasutitaqarneranni isumaqatigiissutaasimasoq siulittaasutitaqarunnaarpata atuutiinnassasoq imaluunniit pisariaqassava isumaqatigiissutip USA-mik isumaqatiginninniutigeqqinnissaa, taakku Issittumi Siunnersiusoqatigiinni siulittaasutitaqalerpata?

3)

Eqqortumik paasinninnerua apeqquutit nunanut allanut sillimaniarnermullu tunngasut Danmarkip oqaaseqarfigisassagai, taakkununnga tunngasut uagut suli akisussaaf-figilersimannnginnatsigit, Danmarkilu oqaloqatigiinnikkut aalajangiunneqareersiman-ningippat Kalaallit Nunatta pisuni aalajangersimasuni oqaaseqartartuunissaa?

4)

Naalakkersuisut Issittumi Siunnersiusoqatigiinni Danmarkimik Savalimmiunillu isumaqatigiissutertik Issittumi Siunnersiusoqatigiit ataatsimiinnerini akunnerminni inissamik agguassisarnissamut tunngasoq saqqummiutissamaarpaat Inatsisartullu Nunanut allanut Sillimaniarnermullu Ataatsimiititaannut assinganik nassitsiniarpat?

5)

Naalakkersuisut Issittumi Siunnersiusoqatigiinni peqataajumajunnaarnertik Issittumi inuit nunallu namminersortut allat suleqatigalugit aaqqissuussimavaat aammalu Naalakkersuisut inissisimanertik atorniarpaat inuit nunallu namminersortut Issittumiittut allat sinnerlugit oqaaseqartarnissaminnut inuit naalagaaffiillu taakku Issittumi Siunnersiusoqatigiinni sapinngisamik nakuunerpaamik nipeqarnissaat qularnaarniarlugu?

Tunngavilersuut:

Naalakkersuisut siulittaasuata ukioq manna siusinnerusukkut aalajangiuppa Kalaallit Nunaata Issittumi siunnersiusoqatigiinni peqataanera tamakkiisumik unitsikkallarniarlugu. Tassunga atatillugu Naalakkersuisut siulittaasuat nalunaarpoq tamatumuuna siuniukkitsik Danmarkip Kunngesarfiata Issittumi Siunnersiusoqatigiit siulittaasutitaqarfiannik nutaamik isumaqatiginninniarnissaa Kalaallit Nunaata Issittumi atorfilitat qaffasinnerusut (Senior Arctic Officials) ataatsimiinnerini peqataatitaqartalernissaa anguniarlugu. KNR-imilu apersorneqarluni Naalakkersuisut Siulittaasuat oqarpoq isumaqatiginninniernerit pingasunik inerneqarsinnaasut; 1) Kunngesarfik Danmark inissanik pingasunik pissarsisinnaasoq, taamalu Kalaallit Nunaat, Savalimmiut Danmarkilu tamatigut immikkut inissaqalerlutik, 2) inissanik marluinnarnik pissarsisoqassagaluarpat

inissat aappaat Kalaallit Nunaannut immikkoortinnejassasoq aammalu 3) inissamik ataasiinnarmik pissarsisoqassappat taanna Kalaallit Nunaata pissagaa.

Issittumili Siunersuisoqatigiit ingerlatseriaaseq pillugu maleruagassai killiliimmata Kunngeqarfiullu Danmarkip ilumini aalajangermagu naalagaaffiup aallartitai qanoq katiterneqassanersut naalagaaffiullu Atorfilittaasa Pingaernerat (SAO) kinaassanersoq kikkullu kinaluunnit isumaqatigiissusiornerni issiaqataassanersoq, eqqumiigeqaarpuit Naalakkersuisut siulittaasuat isumaqarsimammat ajornartorsiutaasoq canadami siulittaasuffik isumaqatigiissusiorfigalugu aaqqinneqarsinnaasoq.

Taamaattumik Canadamiut siulittaasuuuitaannik isumaqatiginninniarerit qanorpiaq angusaqarfiusimanersut paassisallugu Inatsisartunut soqutiginarluinnassaaq, soorluttaaq Naalakkersuisut Siuttaasuata kaleriutigeriigaatut Issittumi Siunnersuisoqatigiinni inissat qanoq agguanneqarnissaat pillugu Naalagaaffeqatigiit iluminni isumaqatigiissutaat suleriaqqinnissamut annertuumik aalajangiisuussasoq.

Aammattaaq soqutiginarpoq paassisallugu Naalakkersuisut uani peqataajumajunnaarnermanni siunertarisimaneraat inuit nunallu namminersortut allat, soorlu Canadamiittut, Issittumi Siunnersuisoqatigiinni nipaasa nakussassarneqarnissaat. Naalakkersuisut Siulittaasuat aggustip 21-anni tusagassiutinut nalunaarummini allappoq "Canadap Issittortaalu assigiissuteqqaagut, taakkulu issittumi innuttaasut pillugit tulleriaarinerat Naalagaaffeqatigiinni iluarisimaarneqarpoq".

Taamaammat Inatsisartunut soqutiginarpoq akissutissarsissallugu, Naalakkersuisut anguniarneraat inuit nunallu immikkoortui namminersortut sinnerlugit oqaaseqartarnissartik, imaluunniit peqataajumajunnaarsimaneq Kalaallit Nunattalu Issittumi Siunnersuisoqatigiinni peqataanissaanik isumaqatiginninniarerni imminuinnaq eqqarsaatigisoqarsimandersoq.

Naggasiullugulu isumarput naapertorlugu Inatsisartunut pingaaruteqartorujussuuvog ilisimassallugu, Canadamiut siulittaasoqarfiannik isumaqatigiissut nutaaq kaleriutigineqareersorlu Kalaallit Nunaata Issittumilu Siunnersuisoqatigiit akornanni isumaqatigiissutit ataavartutut isigineqassanersoq, imaluunniit Issittumi Siunnersuisoqatigiinni siulittaasuuffiup allangorneri tamaasa nutaamik isumaqatigiinniartoqartassanersoq. Tamatumani innersuussutigeqqillugu Issittumi Siunnersuisoqatigiit ingerlatseriaaseq pillugu aalajangersagaanni allannguisoqarsimannginnera.

Ullut suliffiit qulit qaangiutsinnagit akissutisinissara qilanaaraara.